



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim




tir yimiyim

TAPAK 7

South Korea captain Son World Cup 4buba asayatsü renemer

Russia tir Putin-i May ita 19 nü China semdangtsü



VOL. XXIII ISSUE NO. 213 (ADOK 213) DIMAPUR AMUNGNÜ (SUNDAY) MONUPII (MAY) 17, 2026

₹ 5.00

Chümoukedima nung Rental Housing for Urban Poor Complex lapokogo

Dimapur, May 16, 2026 (TYO): May 16, 2026 nü Urban Development & Municipal Affairs, Zhaleo Rio, IAS (Retd.)-i Chümoukedima nung Rental Housing for Urban Poor Complex lapok aser Swachh Bharat Mission (Urban) aser State Plan kübok sanitation vehicles sayatsüogo.

"Chümoukedima Town Council (CTC) aser department ajanga iba sentong nung yaritepba atema pelar. Rental Housing for Urban Poor project renemba ya tongtipang alizüing ka atongba lir aser iba ya sensakertem, aayangertem aser senotsü peria mangurtem asoshi lir" ta Zhaleo Rio-i ashi.

Iba housing facility nung lisopur nem dang masü saka district nung aliba India senso shia lidaktsütsü aser iba nung tangalen nungi aruba aayangertem dena lir saka oziung alema arur tembo melidaktsütsü ta pai ashi.

Iba complex nung 1BHK apartments 384 lir aser mezüing küm asem atema itashia Rs. 1,000 agitsü. Tarutsü nung Chümoukedima Town Council (CTC)-i state sorkar den asüingdangteper sen atutsü akok ta Zhaleo-isa ashi.

District nung waste management aser sanitation practices timi inyaksüla aser public-i merükmejuba maparen nung amalitepa yariteptsü ayongzüker ta paisa ashi. Zhaleo-isa Urban Local

Bodies (ULBs) dang ochishia aser tebilemstü khuret bena inyaksangshitsü aser councillor temi administration aser public den amalitepa pei pei ward nung terenlok mapatongtem inyaksü ayongzüker ta ashi.

Iba mapatong lapokba ya department aser state sorkar atema konang ka lir. Mapang atsülangaka senotsü lemzüksüba ama iba mapatong inyaktetogo ta Commissioner & Secretary, Municipal Affairs Department, Kekhrievor Kevichusa-ia ashi.

Senotsü aika endoka inyakba mapatong ka mesüaka iba ajanga Chümoukedima aser temeket nung teyari agütsütsü. Iba facility anepalutsü atema department-i Chümoukedima Town Council den sendakteper inyak ta Kevichusa-isa ashi.

Iba mapatong ajanga Chümoukedima Town Council asoshi senotsü angutsü anungji CTC-i low-income workers yaria senotsü agitsü ayongzüker ta paisa shisem.

Iba sentong nung EE-II, UEW, UD Er. Olemchila IYaden-i technical aser financial reports osang metetdaksü.

Iba mapatong atema Ministry of Housing & Urban Poverty Alleviation (MoHUPA)-i senotsü agütsü aser Rajiv Awas Yojana (RAY) scheme kübok inyak ta lai Er. Olemchila-i ashi.

Iba mapatong ya M/s Zaputuo Lhoungu ajanga Rs. 1,553,266,000 endoka yanglu ta laisa shisem.

Nagaland-i National Departmental Summit nung aden

Dimapur, May 16, 2026 (TYO): May 15, 2026 nü online ajanga "Institutionalising Capacity Building: From Training to performance linked Governance" indang National Departmental Summit ka agiogo.

Iba sentong nung tongti tesemdangerji Minister of State for DoPT Government of India Jitendra Singh liasü aser Capacity Building Commission (CBC) Chairperson S. Radha Chauhan-ia o jembi.

Iba sentong ya Ministry of Personnel, Government of India and Capacity Building Commission (CBC), Government of India ajanga ayongzüker aser ATIs (Administrative Training Institutes), CTIs (Central Training Institutes), General Administrative Department, Karmayogi Bharat aser ano tanga

ketdangsür aika aden.

Nagaland nungia Additional Chief Secretary, Agriculture Department aser APC & Director General of Administrative Training Institute, Nagaland V. Shashank Shekar, IAS-i anir Additional Director, ATI Bendanglila, Joint Director, ATI Kaholi, Deputy Director ATI Imlibenla Jamir, Lect. IT, ATI Peter Konyak aser Under Secretary, P&AR Department Limakumla nung aden.

Iba sentong nung "Unified framework for role focused & performance-linked Capacity building, strengthening training institutions, Leveraging AI and technology for Hyper personalised learning aser Reimagining Cadre Training aligned with CBPs" onüktem benoka lemsatop.

Naga nunger pei sasa ketdangsüa aotsü nungi masetshir

Kohima, May 16, 2026 (TYO): Naga National Council (NNC)-i Naga nunger pei sasa ketdangsüa liyonga aotsü tangatetba nung masetshir aser Naga nungeri August 14, 1947 Naga nüjiso sangdong aser May 16, 1951 Naga voluntary plebiscite putiotsü ochi nung noktaksü ayongzüker ta NN President Adinno Phizo-i ashi.

Chedema Peace Camp nung 76 buba Naga Voluntary Plebiscite Day indang sentong agidang Joint Secretary NNC, Zhusheli Khamo-i telok dang Adinno indang osang zünga metetdaksü.

"Asür NNC president A. Z. Phizo lenisüba kübok plebiscite agi aser iba ya otsüsütsü anogo ka liasü kechiyong Naga nungeri pei sasa mulungteta inyakba maparen ajanga Nagaland indang independent status jangjatsü" ta Adinno-isa ashi.

Alemla Naga nunger ya shinga kübok maliasü aser republic village states ajanga pei sasa ketdangsüa aru aser tanga tashitem agi amokbanga mayu ta laisa ashi.

Taoba Naga Hills district nung British ketdangsürtemi yimjung atema dang ashi yimtenren kübok amokbanga mayu. Naga lennirtemi Simon Commission nem agütsüba 1929 memorandum ajanga British nunger dang Naga nunger yimtenren temetentem nenshia liasü. Iba memorandum ajanga Naga nüjiso mesüra Naga nungeri pei tarutsü asoshi lemteta aotsü temeten meshi ta Adinno-isa metetdaksü.

India-i nüjiso angutsü anogo ka jakdang NNC-i August 14, 1947 nü Naga independence sangdonga liasü ta laisa shisem.

"Naga lennir kari dang nüjiso pusemer ta India-i ashiba anema 1951 plebiscite agi. Iba plebiscite ya May 16, 1951 nü agi aser nisung 99.9% ajanga pei sasa ketdangsüa aotsü atema nungit aser nisung karibo azü agi meyongnem anem" ta Adinno-isa metetdaksü.

"Naga tebilemstü ya pei sasa ketdangsüa aotsü movement ka masü mesüra oziung alema inyakba masü saka kümteta aliba

jenjang ka kümzüka ayuba movement ka lir. Naga nungeri Federal Government of Nagaland ta ser sorkar liasü aser India sorkari tashiyim aser rara ajanga Naga putiotsü ajembanga ayutsü meranger" ta laisa ashi.

Naga nunger ajak longjemtsüla aser atsünga agirtem anema inyakba nung külemi noktaksüla. August 14, 1947 sangdong aser May 16, 1951 plebiscite ya Naga nunger tongshitem lir ta Adinno-isa metetdaksü.

"Putiotsü asenok den lir. Asenoki tsübütsü mesüra tezü atangtsü kecha mali. Naga nunger longjema alitsüla aser tesüba lennirtemi lenmang yanglua yutsüba nung maneni jajatsüla" ta laisa ayongzüker.

Iba sentong nung taoba FGN Kedahge Gen. (Retd.) Vivalie Metha-ia o tatsüka jembi aser Chedema Baptist Church Pastor Neizo Pienyü-i Lai zünga sarasadem.

Sentong nung mendenji Khamo liasü aser Chedema BKK o K. Heshu & friends nungeri ken ajanga shilem agia liasü.

Tongpang Ozüküm-i 'Samanir T Sentichuba' kakat sayatsü



May 16, 2026 nü Hotel Grand Vista, Dimapur nung 'Samanir T Sentichuba' kakat sayadang (abelen nungi) asür Sentichuba kinungtsü Wt. Chubasenla Imsong, Evangelist, IEF Dimapur Rev. Lanuakum, MLA & Advisor Tongpang Ozüküm aser kaketzülur Tiala Imchen nunger külemi agiba noksa angur.

Dimapur, May 16, 2026 (TYO): May 16, 2026 nü MLA & Advisor, Water Resources, Nagaland Tongpang Ozüküm-i 'Samanir T Sentichuba' ta ser kakat ka sayatsüogo.

Hotel Grand Vista, Dimapur nung sentong ka nung kaketzülur Tiala Imchen-i Ao oshi nung züluba kakat ya sayaogo.

Asür T Sentichuba-i 1969 nung mezüing Yisemyong constituency nungi takok ngua MLA tenzük aser iba sülen 24th Angetyongpang constituency nungi tenetben tashi Nagaland Legislative Assembly züngsemka ama inyaka aruogo.

Pai terben tashi state

assembly elections nung toktepdang tenetben takok ngua MLA aser Minister inyaka aruogo.

"Asür Sentichuba ya lennir ka dang masü saka tebudi ka ama liasü aser pa shisatsü aser aria bilemstüba ajanga par constituency sangertem tapu balala agi yariogo" ta Advisor Tongpang-i ashi.

Pa ya atangji nübortem shimetba lennir ka liasü aser pai mapang tamajungtem ajurudanga par nübortem len anir aru ta Tongpang-isa ashi.

"Asür Sentichuba taküm ajanga jaklaliro, temlungtetba aser nübortem bendanga agüja

tenzükba ya lenisüba tongshitem ta nenshia sayur. Lanu putui pa taküm nungi angazüka loktiliba yangertsü asoshi tebilemstü khuret abentsü ayongzüker" ta Advisor Tongpang Ozüküm-isa ashi.

"Pa ya chichiba linük meimer ka liasü aser loktiliba tenzükba ta tematiba mapa ta amanga inyak. Pai nübortem ajungkettsü atema state politics nung kanga dang tasü itta aser temlungtetba tulu nung ajemok" ta paisa shisem.

Asür T Sentichuba ya May 2, 1935 nung aso aser November 25, 2025 nü pa kinungtsü Wt. Chubasenla Imsong den tanur 6 yutsür alima nungi pilaa ao.

NSLSA-i ayongzüka legal awareness sentong ka agi



Dimapur, Monupii/May 16 (TYO): Nagaland State Legal Services Authority aser Peren District Legal Services Authority na longjemer District jail, Peren nung legal awareness sentong ka ayongzüka agiogo.

Sentong ya Adv. Indeu Hiekha, Penal lawyer PDLA

lenisüba nung agi aser Dy. superintendent of jail Peren Imlinungba Longkumer-i lokti pela agizükba o jembia liasü. Sentong nungsa NJS Member Secretary Neiko Akami-i, tepuokdak alirtem temeden aser tinyaktsü indang metetdaksüba den jurila obendanger maturtemi

koda legal aid counsel teyari agitettsü iba indang tangazükba agütsü.

Kasa mapang nung Penal lawyer PDLA Adv. Kidungyi Putlang-i, India temzüng ozüng kübok tepuokertem nem temeden agüja aliba indang metetdaksü. Sentong nungsa Senior Superintendent of central Jail Dimapur-i anküp o jembia liasü.

Ajak senteper tepuoker tebur 14 aser tetsür 1-i iba sentong nung shilem agi, aser tepuoker 6 bo Legal Aid counsel-i represent süa liasü.

Sensaksema mapang UTPS asem tashi shingai represent masüba ngutet aser jenjang tapet agitsü atema LADC dangi abenba NJS Chief Judicial Magistrate Cum Secretary PDLA Khrievonuo Seletsü-i metetdaksü.

Excise Duty Party-i tenokdangba agütsür aliba mozü apu



Dimapur, Monupii/May 16 (TYO): May 15 nü Pherima, Chümoukedima nung Mobile Vehicle Checking Point (MVCP) inyakyim benoka inyakba mapang Dimapur District Excise Duty Party-i, Registration No. NL-07C-1176 keta aliba gari ka sot.

Gari kanga junga bushiba mapang iba team yagi Zunheboto District, Atoizu kübok Awotsakila yimtsüng nung alir Shikhovi Shikhu'er jabaso Oto Shikhu ket nungi Codeine-based cough syrup bottle 308 aser Alprazolam tablets 24,000 pua liasü.

Ken o bushisüngdangba

sülen mozü ya Khushaibill, Nuiland nung enok asü aser Atoizu, Zunheboto-i bener aoerba liasü, ta ngutetogo.

Temzüng ozüng dak ajemdaker temesepba mozü ya puogo aser Narcotic Drugs and Psychotropic Substances (NDPS) Act, 1985 kübok provision tapet dak ajemdaker ken o ka benokogo. Ken o maneni bushisüngdang südar.

State nung temesepba mozü shibelenba nokdangtsü aser nüberkem kümzüka toktsütsü atema Excise & Prohibition Department maneni bendanga agütsür inyaka arudar.

Manipur nung nisung tepsetba aser pur aoba ZKPO-i aitsü

Dimapur, Monupii/May 16 (TYO): Zeliang aser Kuki nungertem külemi aliba Ahthibung Sub-Division nung alirtemi tawa Manipur nung Kuki aser Naga nungertem tepsetba, pur aoba aser ki-o-jen raksatsüba khukhua aitsüogo.

Kin anapronglai tai maketba nüberkem pur aoba ya agizüktsü makok. Kar ajangzüktsü atema tai maketba nüberkem amshiba ya humanity aser inyakyim ajak anema aser Khrista dak amangertem tangatetba anema lir. Onoki telok ajak dang parnoki pua alirtem chiochtsü akhanger, ta ZKPO tir Lamhen aser General Secretary Ikiak nati sangdong ka ajanga metetdaksü.

Onoki ano pastor tem aser Tsüingrem tenzükerkem tepsetba ya aitsür. Arogo tenzükerkem

aser tai maketba nüberkem amakba ya meimchiri inyakttsüba inyakyim ka masü aser agizüktsü makok.

Iba amala azütokshi, tesempatep aser amokmeren ya Ahthibung Sub-Division nung aliba yimjung meimba nüberkem tejangraba aser tangatetba anema lir. Ahthibung Sub-Division nung Zeliang aser Kuki nungertem küm aika yimjung nung lia aruba ya tanga tesem ka nung tia maka tatalokba kar ajanga minprong mesüdaktsütsü, ta kasa sangdong ajangasa metetdaksü.

Kin anaprongla nungi lenirtem, lokti tentet balala aser lisopurtemi ajak dang azüzüktepa inyaksangshitsü, kin o kin tsüingda yimjung aser tesunep nung alitsü merangtsü mepeshiba den iba tesem nung

yimjung nung nüberkem litepa aliba minprongtsü atema tsükchitap prokshitsü, osang tai agütsüba mesüra amokmerentsü meranga khen yongi magizüktsü, ta parnokisa ashi.

Maneni Ahthibung Sub-Division nung aliba kin ajaki yimjung wazüka ayutsü, kati ka akhümtsübutepstü, telungjem nung alitsü tali bendanga agütsüshir. Telemdang adokdaksütsü mesüra kin o kin tsüingda rarabangsen adokdaksütsü merangra iba anema nübertemi apusotsü.

Onoki ketdangsurtem dang azütokshi anendaksütsü aser tai maketba nüberkem tekümzüka kübok toktsütsü aser aibelena lirtem nem tapet obendang agütsütsü akhanger, ta lenirtem yagisa metetdaksü.

Peren District nung Food Safety sensitization sentong agi



Dimapur, Monupii/May 16 (TYO): Lokti health & nutrition jenjang ajungkettsü nükjidong nung Peren District kübok Ahthibung, Samziuram, Mhainamtsi aser Heningkunglwa yimtsüng nung May 14 aser 15 nü comprehensive Food Safety sensitization sentong ayongzüka agiogo.

National health nükjidong aser tekübokba jenjang nung iba sentong benoka inyakba tsüingda apu latsütsü nükjidong nung amenokba "Eat Right India" movement kübok iba sentong ayongzüka agiogo.

Food Safety Officer, Dimapur Sukumlo Yanthan-i, jang, wheat mamatzü aser totzü

amala chiyongtsütem tenüngdakba vitamins aser mineral tem agi koda tajungba kümduktsü iba indang lemsatet. Sentong nung shilem agirtem nem trans fats ajanga temang nung timtem adokba indang tangazükba agütsü. Maneni iba session ya metzü, shine aser totzü tajemba achitsüba dak rangloker agia liasü.

Tanabuba session nung Food Technician Zuthungbemo K Ngullie-i, chiyongtsü label tem azüingtsü nungdakba aser medically recommend asüba ORS aser shishilembadak ayokba ORSL drinks indang tebandang metetdakja liasü.

Technical session nung sorchiok dang amshiba totzü

aiben amshiba indang jembia aser ashiba agi, totzü aiben amshiba ajanga total polar compounds (TCP) bendenba aser iba ajanga koda temang nung timtem agütsür iba indang rasa ashi. Ano carbonated beverage tem nung shine aika keta aliba aser iba yagi koda tanurtem dak Type 2 diabetes adokdaksür iba indang tangazükba agütsü.

Sentong ya anogoshia achiba chiyongtsütem nung meyokteperatem jangjatsü atema inyakyimtem sayuba sülen tembanga liasü.

Sentong nung village council züingsemtem, ASHA tem, Anganwadi worker tem, SHG aser Arogo tenzükerkem shilem agia liasü.

MSME Promotion Council-i ayongzüka outreach sentong agi

Dimapur, Monupii/May 16 (TYO): Business balala kibur aser sorkar scheme tem sendakteptsütsü, sentotsü teyari agütsütsü aser shishilembadak maongka lapoktsütsü nükjidong nung MSME Promotion Council of India, Dimapur chapter-i ayongzüka Honibarnü Hotel Saramati nung outreach aser sensitization sentong ka agiogo.

Sentong nung o jembiba mapang State chairman MSME PCI Nagaland Lanuakum Jamir-i, rongsenketzüng nung renloka aotsü atema Nagaland dak tashi lir, ajisüka sorkar mapa dak tali metalokba ya asen state asoshi tongtibang tetsükdaksü ka lir, ta ashi. Sorkar mapa ya telatet ka dang lir, ta pai shisem.

Pai lanurtem dang sorkar mapa atema dang nükjidong mayutsü, saka private sector nunga lenmang bushia oa inyaktsü ajungshia liasü. Entrepreneurship, MSMEs aser startup tem ya option ka dang masü saka tangar dak memetaloki taküm nung soyima liyonga aotsü atema kanga tongtibang lir. Pai item sector tem ya tarutsü nung terenlok aser employment atema engine tem lir ta ashi.

Maneni pai, June tom tashi

nungbo MSME Promotion Council of India Financial Compliance Program amenoktsü atema MSME Promotion Council of India sentong lir ta ashi. Iba inyakyim ya mapatem tongmelangba aser dalangba kümdukja entrepreneur, startup, SHG aser MSME tem nongita yaritsü nükjidong nung benokba lir, ta paisa shisem.

Iba sentong ajanga Nagaland nung MSME tem professional compliance service tem nung sen ishiba entoka ajangzüktsü aser iba den GST aser business registrations atema len sayutsü, rongsenketzüng nung record shitak ayutsü atema teyari agütsütsü, loan documentation atema nongita yaritsü aser sorkar scheme tem atema renema toktsüja ajangzükduktsütsü.

Kasa mapang nung District Employment Officer, Dimapur Gideon Sumi aser Nagaland Tool Room & Training Centre (NTTC), Manager Awalo Keppen natia o tatsütsü jembia liasü.

Sentong nung Best Village Cordinators Achum Ovung, Pangloi H Phom aser Supongtoshi nung nem tetushi agüja liasü.



May 16, 2026 nü Hague, Netherlands nung Ato kilonser, Narendra Modi-i India nunger telok kati shilem agiba reprangdang tangokba noksa nung angur.

NEET paper leak asüba ken o nung CBI-i botany tesayur ka apu

New Delhi, Monupii/May 16 (Agencies): NEET-UG 2026 question paper leak asüba ken o dak sendakba nung Honibarnü Central Bureau of Investigation (CBI)-i Pune nung botany tesayur ka puogo, ta osang ka ajanga metetdaksür.

Medical entrance tatidang nung Biology questions leak asübaji la ajanga lir ta jangjaogo.

Manisha Gurunath Mandhare ya Pune yimti nungi Botany tesayur ka lir. CBI-i Delhi nung la dang asüngdangyaba sülen la apu.

CBI-i ashiba agi, NEET-UG 2026 tatidang atema questions renemtsü asoshi mongin ka ama National Testing Agency (NTA)-i la-a shima liasü, aser ibaji ajanga lai Botany aser Zoology question papers nung alibatem meteta liasü.

Bushisüngdangertemi ashiba agi, taoba ita lai Manisha

Wagmare ajanga Pune nung NEET tatidang agütsüsupurtem ayongdena coaching agüja liasü. Manisha Wagmare bo May 14 nü pua liasü.

CBI-i, Mandhare-i Pune nung lar kidang kaketshirtem atema special coaching classes ayongzüka agi, aser iba mapang nungji lai NEET tatidang atema renemba Botany aser Zoology questions aika kaketshirtem denji lemsatapa liasü.

CBI-i, item questions ji teimbaka NEET-UG 2026 question paper nung liasü, ta ashi.

NEET tatidang ya May 3 nü agi ajisüaka paper leak asüba osang temai adokba sülen iba tatidangji magila aküm aser June 21 nü tanaben iba tatidang agishitsü.

Iba ken o nung tai tonglokja alir Manisha Wagmare aser PV Kulkarni naprongla Delhi

nung aliba Rouse Avenue Court matsüngdangi anir oa liasü.

Court nung CBI-i tenaprong anogo 14 parnok ket nung ayutsü asüngdangogo.

Kasa ken o nung May 14 nü CBI-i Latur yimti nung retired chemistry professor PV Kulkarni pua liasü. Kulkarni ya question papers renemba panel nung densema lir.

Tesüiba anogo ka tsünga CBI-i linük tesem balala nung tesem trok mita oa tashishitsü aketba kaketem, laptops, bank statements aser mobile phones aika apuba sülen itemji bushisüngdang tenzüko.

Tang tashi nung iba ken o nung Delhi, Jaipur, Gurugram, Nashik, Pune aser Ahilyanagar yimitem nung nisung 9 puogo aser parnok rongnungi nisung pongubo anogo tenetnü atema police nem agüja lir.

BJP-i Kashmir nung yi nokdangtsü takhangba agüja longkak ait

Srinagar, May 16 (Agencies): Kashmir Valley nung yi nokdangtsü takhangba agüja BJP-i Jammu & Kashmir Chief Minister, Omar Abdullah'er kima longkak ait.

BJP-i, National Conference sorkari takhangbaji magizükra BJP-i south Kashmir kübok Qazigundjila nungi tenzüka north Kashmir kübok Karnah area tashi nung longkak aittsü, ta metetdaksü.

Osangbenertem den jembidang BJP lenir Altaf Thakur-i, "BJP-i temesepba mozü aser yi tapu ajak anema nokdaker. NC sorkari J&K nung

lanurtem nem yi jemdaksüner. Yi ayoktsü pusema NC lenirtemi jembibaji onoki magizükter. Kashmir ya shisa akartem adokdak lima lir, anungji iba lima nung onoki yi ayokba dokantem memelatsü," ta ashi.

BJP general secretary Anwar Khan-ia, Chief Minister Omar aser National Conference Tir Farooq Abdullah nati yi ayokba ajanga saru teimba akümstü atema dang bilemer. BJP nung inyakertemi ruling party atemaji mosques kima mener meshi metsütsüsü koka lir, ajisüaka lanurtem tarutsü jenjangbo onoki meraksadaksütsü," ta

metetdaksü. BJP nung inyakertemisa, LG Manoj Sinha-i temesepba mozü anema anogo 100 mita aotsü lemtet, süra iba nungji kechiba yi ayokbabo mezüngoker, ta asüngdang.

BJP otongdar, Sajid Yousuf Shah-i, police-i pa densema longkak aiter nisung 10 apu saka ghonda ka shi lirbo chiok, ta metetdaksü.

April 11 nü LG Manoj Sinha-i temesepba mozü anema anogo 100 mita aotsü sangdongba sülen lokti tentet aikati yi-a nokdangtsü atema takhangba agütsür.



Bhopal, May 16, 2026: Petrol aser diesel totzü jenjang atuba anema Honibarnü Bhopal nung Madhya Pradesh Mahila Congress Tir, Reena Borasi Setia leniba nung party nung inyakertemi longkak aitba noksa nung angur.

BRICS senden nung West Asia atema külem sangdong magütsütet

New Delhi, May 16 (Agencies): Hokolbar aonung Delhi nung BRICS foreign minister tem senden tembangogo, ajisüaka West Asia tensa dak sendakba nung obang meputepba ajanga BRICS linüktemi külem sangdong ka magütsütet.

UAE-i Iran inyaksangshi atema Iran sashia aitsütsüla ta takhangba agütsü aser Iran-ia US aser Iran na sashia aitsütsü takhangba agütsü.

BRICS Chair-i, West Asia/Middle East region dak sendakba nung züngsem linüktem tebilemba balala aliba ajanga külem sangdong magütsüteter, ta metetdaksü.

April ita nunga India nung BRICS deputy foreign minister tem aser tongti ketdangsertem senden mena liasü saka kasa kuli ajanga külem sangdong magütsüteti liasü.

Tesülen Iran foreign minister Seyed Abbas Araghchi-i külem sangdong magütsütetba atema UAE aitsü.

Iba mapang nungji Araghchi-i UAE tenüng metetshii, "Israel anema koba linüki tetsükdaksü

agütsürar ajaki meteta dang lir. Iba ya kanga tia maka. Iba linük yagisa Iran amaktsü atema US aser Israel na yari. Iran anema inyakba nung parnoki indangindanga shilem agia lir, anungji iba linük ya aitsütsüla," ta ashi.

"Iran ya kiyonger linük ka ta parnoki angatettsü ni imlar. Ano tarutsü putu aika onok külemi dang alitsü," ta pai ashi.

Osang angazükba agi, BRICS foreign minister tem senden nungji tekaraba nung West Asia nung rara anentsü, linüktem indang litsü akhümstübuttsü, international ozüng beshitsü, tziyim nung rong sademsadema senzüdaksütsü aser civilian kiojen aser civilian akhümstübuttsü atema jembio.

BRICS senden nung Strait of Hormuz atemabo mejembi, ta osang angazüker.

BRICS züngsemtemi Gaza Strip ya Occupied Palestinian Territory shilem ka lir aser anaji pilatsü makok, iba denji külemi Palestine kübok West Bank aser Gaza Strip ka küma longjemtsü nüngdak, ta bangjema liasü.



Thiruvananthapuram, May 16, 2026: Kerala Chief Minister menden atema shima alisang Congress lenir, VD Satheesan-i (ajichilen) Thiruvananthapuram nung osangbenertem den jembidang tangokba noksa nung angur.

Tamil Nadu nung vote agütsüba atema bendanger 10 pua lir

Chennai, May 16 (Agencies): Taküm April 23 nü Tamil Nadu assembly election nung bendanger nisung 10-i vote agütsü, ta tai tonglokja lir; Election Commission-i ibaji bushisüngdangtsü atema tetuyuba agütsüogo.

Tawa police-i, bendanger nisung ter tayimtsüi ayaketa alitsü lia puogo, kechiyong parnok temeyong nung vote agütsüba temaitsü ajenloker liasü, ta metetdakja liasü.

Chennai police-i, Tamil Nadu assembly election nung ozüng alema vote agütsüba ken o 9 benoka lir aser iba dak sendakba nung bendanger 10 puogo, ta metetdaksü.

Bendangertemji Chennai aser Madurai na nung aliba airports nung lia apu. Bendanger terji Sri Lanka, UK aser Canada linüktem nungi lir.

Police officer kati, "Vote agütsütsü atema parnoki India nunger ID taila amshia liasü. Parnok tayimtsüi ayaketa atutsü lia parnok temeyong nung vote agütsüba temaitsü ajenloka aliba ngua apu," ta metetdaksü.

"Central Crime Branch-i ken o 9 benokba sülen item ken o bushisüngdang tenzüko. Election Commission temzüng kübok vote agütsür kaji India senso asütsüla aser senso toktsürtemi vote magütsütsüla," ta paisa metetdaksü.

Non-Resident Indians (NRIs) temi vote agütsütsü atema Representation of the People Act kübok Section 20A nung ajemdaker register asütsüla aser vote agütsütsü mapang nung polling booth nung original Indian passport sayutsüla, ta paisa shisem.



TIR YIMYIM YIMOBILEM (EDITRIAL)

DIMAPUR SUNDAY, MAY (MONUPII) 17, 2026

Yimsüsür aser ketdangsertem

Alima nung Tsüngremi alakteta shimba Israel nunger yimten yimsüsübaren yabo kenyongi tangar kintem dang nungi balaka asütsüba liasü. Tangar alima kin shia madak yimsüsütsü asoshi chuba mesüra yimsüsürtem lir, saka Israel yimli madakbo Tsüngremi dang yimsü süa liasü. Israel nunger atema chuba mesüra prime minister-ji Tsüngrem asütsüba liasü. Ajisüka, Israel nungertemi parnok madak Tsüngremi yimsüsüba yimlij maginüi aküm. Parnoki tangar alima kintem ama, Tsüngrem dang nungibo nisungi yimsü asübajiang tajungba asütsü amai bilem. Anungji, kenü anogo Israel nunger tamburtem ajak senteper Samuel dang tangar kintem ama parnok madak yimsüsütsü aser obendangtsü asoshi chuba ka meshi. Iba o jagi Samuel mepeladaksü, anungji pai Kibuba dang sarasadem. Atangji, Israel nungertemi Samuel dang parnok madak obendangtsü atema chuba ka meshiba kuliji nisung tsüngdangbo au ta asütsüba kuli ka liasü. Joko, Samuel tambur akümer aser pa melentsüsa par chirnur kata mali, ajak samesa nisung dang liasü. Anungji, Samuel masüdangsa parnok Samuel melena parnok madak obendangtsü asoshi chuba ka shimtsübaji kanga rongdak nungdaksa bilem. Tetezü, Israel nungertemi Tsüngremi parnok nem ano Samuel melen obendanger tajung ka agütsütsü ta mamang. Anogo shia, Israel nunger kija, kibong, lokti aser yimten nungdak ajak atalokdakja Tsüngremi yarir ser nung, ashiko parnok ibaji mereprangtet südi. Aji oda, tsükchirtem ajak madak takok agüja aniba Tsüngrem kübok alitsü melen, alima chuba kübokang alitsü Israel nungertemi mulungtet. Kodang Samueli Israel nunger tamburtem o nung mepelai Tsüngrem dang sarasadem, Tsüngremi Samuel mulung sünepja ashi, " parnok ashibaji angang, kechiaser parnok na magizük masü saka ni parnok madak chuba asütsü parnok magizük." (1 Samuel 8:7) Tanü asenoki Israel nungertemi Tsüngrem melen nisung chuba südaktsütsü mulungtetba tamashi mapaji menüja bilemer. Ajisüka, asenokia aiben Tsüngrem leniba asüngdangtsü melen asenoki mulungba nung dang asenok mapatem inyaker. Tsüngremji asen madak kibur aser chuba, anungji asenok shisabolutsü mali, Pai asenok anüker, asenok len anir aser asenok moatsür. Asenok teinyaktsü mapa ajunga agi, Pai agütsüba takok aser temoatsü madak ochishia ketdang asütsübaji dang lir. Aji oda, asenok madak yimsüsürji Tsüngrem aser asenok Pa kübok ketdangsertem asünungji, asenok teinyaktsü mapa aser aotsüba lenmang ajak Pai asenok dang sayutsü. Aji oda, Pai agütsüba taküm, temang aser tanüla ajak madak ketdang asütsübaji asenok shilem aser asenok khuret. Pai asenok kibong nungdak meteta lir. Pai asenok chinurtem kongi yoktsü meteta dang lir. Pai asenok nisung shia nem kinungtsü aser kinungbo asütsü tetemsü apuani agütsür. Asenoki Pa dak temulung lemtetsüla aser asen taküm aser kibong madak Tsüngremjiang yimsüsür südaktsütsüla. Israel nunger amaji Tsüngrem masü saka nisungang külemnüba, Tsüngrem masü nisung tenügang sangnüba aser Tsüngrem nem masü nisung nemang junger ta shidaktsünüba shisatsü aser tangatetba nungi asenok pilatsüla. Tsüngremji alima yimsüsür aser chuba meyirijang dang nungi tashi tuluba, kechiyong Pajibo chubatem madak Chuba. Alima chuba masü saka Kibuba Tsüngrem, shibai alima chubatem shimer aser atsüngdoker, Paji dang asenok madak yimsüsür südaktsüdi.

OLEMSABANG

KECHI KOMALA KIBONG DANG KHRISTAN KIBONG TA AJATSÜ ?

~ L. Kika Pongener

Kibong ya asen mimchir mulungba aser taginuba nung masü, saka Tsüngremi pa nukjidong ka yur yanglua ta asenoki laishiba nungi angateter. "Aser Kibuba Tsüngremi ashi nisungji kija alitsü majung, ni pa asoshi teyarir tetemsu ka yangludi" (Lipok-2:18-24). Tsüngremi Adam dak nungi tesaret ka agiteter tetsür ka 'Eve'-la yanglu; aser la nisung dangi anir aru. Anungji kinungburi pei tebu aser tetsü toktsür pei kinungtsü den sentepa alitsü aser tena shi ka dang akümstsü. Yamaji Eden tsüki nung Tsüngremi mezüng kibongji tenzüka toktsü. Anungji iba kibong jagi Tsüngrem nukjidongji atalokdaktsütsüla. Tenyar Paul-i Efesa nunger dangi züluba shiti nung; kinungbuji Yisu Khrista aser kinungtsüji arogo ta atishia züluba angutsü. (Efesa-5:22-27). Anungji kibong ya ata-mata mapa ka masü, saka jenjang kanga tulu lir; kechiaser iba ya Tsüngremer sentong tulu ka jungkai adoktsüba lir. Anungji asenoki kibong ya pongpa-pongpa-a mesen-metoea mebilemstsüla; saka kanga ret-reta agitsüla aser asen kibong ajanga Tsüngrem'er sentongji atalokdaktsütsüla.

Scholar aser Laishir Dr. Dehan-i yamai ashi....Kodak atongtsüba anasatiba lenmangji kibong ya lir. Aji oda, nisung ka kodaki aotsü mesura molumi aotsü; iba anapronglaji iba kibong ka nungjagi renemstsür. Anungji kibong ya kodak aser molumi anaprongla asoshi lemjem (Cross-road) lir. Sayutsüngir Billy Graham-i yamai ashi....Kodang kibong ka nungi Khrista agienadokdir, idangji khristan kibong ta asüba tetezüji sama-adoker. Tetezü... Koba kibong Khrista dak metaloka mali; Yisu Khrista den sendaktepa mali; iba kibong nungji Khtista jakla mali; Tanela nung tasü kibong ka asütsü. Surabangla, iba amala kibong nungjagi nisung ka kodaser kodaki aotsüba renemstsütetsü....??? Ano sayutsüngir Billy Graham-isa yamai ashi, Nisung miimchir tashi aser rongsen agi ki tajung yanglutsü akok; ajisuaka, iba ki nungji anisungzüka, tepela aser tesunep nung alitsübo meyanglutetsü; kechiyong ibajibo Tsüngrem ket nung dang lir. Ano nisung miimchir tashi aser rongsen agi yipden tajung Hon aser Taribi agia yanglutetsü; saka iba yipden nungji ayipjanga mejangtsübo meyanglutetsü; kechiaser ajibo Tsüngrem ket nung dang lir. Ano Tsüngrem o-ia ashir....Kibubai kiji meyanglura, iba kisurtem amajok nung belemer" (T.Ken-127:1). Aji oda, aseni yangluba ki nungji Kibubai nuka melira mesura Tsüngrem tatenba melira; iba kiji tetsübotsü aser tajemtsü ki ka dang asütsü. Ano |Tsüngrem o-i ashir...."Nisung nem Tsüngremi rongsen takaba aser tetushi jenti agütsü; oda pa taginutsü kecha agia manungtsüsa; saka aji achitsü aser agitsü Tsüngremi pa nem magütsü; saka aeiner kati-ang ibaji achir" (Sayu-6:2).

Tanü putu nung kibong aika ki tulu taren-taren atongtepa; senti rongsen agi menokbanga yanglua yur, kimong-lumong aika alidena yur; sen Bank aika nung lakh-sa lakh aser Crore-sa crore rizünga yur; chiyungtsü chir-mechima nangdaka yur; aben-suoshi agir magima nangdaka yur; oda taküm nung nungdakba osettsüset (Luxury goods) agir-magimai nangdaka yur....Saka ashi-auer tsübuba agi pei kidang ayipjanga memejangteter; tsükchir tsübuba agi kima yimdong nung sadem-sadema mesenzüteter; tashidak agi techiyungnutsü kecha mechiyungteter....ta asüba nisung aika dang lir. Sayutsüngir kakat nung ashiba amaji....Kechisarena aika akayongjia tenuk agi reprangba dak alaka kecha tajangzük mali; anungji aika nangdaka liaka ajakji amajok dang asütsü. "Kü narong nung Temeranger Kibubai shiogo, "Atangji ki aika azüng-azünga, ki tulu aser tajung nisung meli-i akümstsü" (Isaia-5:9). Ajisuaka, shirnoki Kibong nung Yisu Khrista 'Kibur' sudaktsür parnokjibo; kechi-komala kibong ka sudir suaka; tetsübo tatenden kecha meli-i sadok-sadoka alitsü. "Parnoki ki sua yangji nisung alitsü aser parnok tsükmenatsü lu ayimtsü aser item sungjang achitsü. Tangar alitsü asoshi parnok ki meyanglutsü, tangar achitsü asoshi metsünutsü, kechiyung sungdong arshi anogo ama kü nubor arishi alitsü, aser parnok inyakba mapa kü teshimtetpuri tatem tonga agitsü. Amajok nung parnok mebelemstsü, mesura tesamatsü asoshi chirnur mesotentsü, kechiyong parnok Kibubai moatsüba kin lir, parnok chirnur parnok den alitsü" (Isaia-65:21-24). Atangji, shirnoki Tsüngremi mulungba ama alir parnokjibo yamaji moatsütsü Tsüngrem'er tenangzükba tulu lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantem dang yimjak nung pei tamang indang jembitsü ayongzük



'Awake, Arise! London 2026 UK Tour' conference nung Christian Concern nung Chief Executive, Andrea Williams-i jembidang tangokba noksa nung angur.

May 16, 2026: Taoba hopta London nung 'Awake, Arise! London 2026 UK Tour' conference nung pei mapa inyakba tesem, yimtenren, school aser moaputem nung maneni pei tamang indang jembitsü Khristantem ajungshi.

Christian Concern-i ayongzükba sentong nung o jembirtemi shisaliok, pei tebilemba jembitsü temeden aser taküm kümzükka alitsü temeden atema jembia liasü.

Christian Concern nung Head of Operations, Andrew Marsh-i, yimjak nung o entepba nungi Khristantemi tesülen atsüngzükka malitsüla; pei tamang indangji Tenla kidang dang masü saka yimjak nunga jembitsüla, ta ayongzükka liasü.

Paisa tamangertem dang meimchir taküm aser sobaliba lenla ajak atema Khristn yimsü tesayuba lir, ta metetdaksü.

Marsh-i, "Na kisür ka, lenmang aoker ka, tesayur ka, kinüngtsür ka mesüra osangbener ka süaka ajak meimchir dang.

Nisung ka, kin ka mesüra linük süaka Tsüngremi mezüngshiba kecha mali," ta metetdaksü.

Marsh-i, Khristan karibo yimjak nung tamang mesüra yimtenren onüktem nung sensaksemtsü atema arendaker, ta ashi.

Ajisüaka tamangertemi Yisu Khrista ajanga tekümtet anguba indang sayutsüngiba dang masü saka pei taküm libaliro ajanga-a tatishitsü sayutsüla, ta ashi.

"Asenok Tsüngrem mesükba nung yanglu aser alima nung Tsüngrem atema inyaksü asoshi asenok yanglu," ta paisa shisem.

Kasa sentong nungji Christian Concern nung Chief Executive Andrea Williams-ia loktiliba nung Khristantemi ajngshiba tayongzükba balala indang jembia.

"1993 küm campus tem nungi Christian Unions agiena liasü aser 1997 küm nurse tem dang tekong nungi Kangki azük agienang ta tuyua liasü," ta lai ashi.

Loktiliba nung Khristantem

ya mitkar ama alitsüla, ta shia Williams-i tamangertem dang tasü itta yimjak nung pei tamang indang lemsateptsüla, ta ayongzük.

"Lanurtem aikati tanaben Tenla kidangi arur. Lanurtemi taküm nung tetezü aser nükjidong bushir," ta lai ashi.

Williams-i, tanü putu nung aikati Khristan yimsü tajemdakdak nungi pilar; talisa tamanger ka maitsü, kibong aser libaro tajung nungi pilar, ta ashi.

Kasa sentong nung taoba mapang Church of England school nung chaplain, Dr Bernard Randall-i, 2019 küm pai school nung yimtenren maitsü indang sayutsüngiba sülen pa chaplain nungi anendaktsüba metetdakja liasü.

Paisa, iba mangatettepi ajanga pai küm tenet tashi ministry mapa meinyakteti liasü, ajisüaka tamangertemi pa kanga nungita liasü, ta ashi.

"The Awake, Arise!" tour ya taküm küm piyong UK tesem balala nung agitsü.

ANO GO ABEN TSÜNGREM DEN

AZÜMESEN ASER TERA KSA TESENTAKT??

'Pei mapa nung anüalemerji, teraksa den adianu.' Apijemtsü shin 18:9

Iba Lai o ajanga ashir, azümesenba ajanga nisung ka ka ta ashitsüji tera tali tapong jembir ama, saka ibai ochi taküm kechi koda takoksai anir aor. Azümesenerji teraksar lir.

Azümesenba indang jembidang, asenoki aiben nisung kar mapang shitak nung mapa meinyakba mesüra oda mapa ta asübaji khenyongi meinyakba indang noksa asen nükilai arur. Saka iba ajanga takoksa bener arutsübaji atamata masü Tatishitsü agi; aluyimer kadi par alu anepalu mesül azümesena kazüra, aih agi tsük amokseptsü, shirurul chiungtsü chitsütsü, aser ajak samatsü. Iba yagi aluyimer taküm dang masü, saka par kibong aser par alu nung metaloker aliba kibong aika raksatsür. Azümesenba ajanga nisung ka taküm dang masü, saka lokti dena raksatsür. Kechi nung südir süaka, kodang asen mapatem mapang shitak nung asenoki meinyaklir, iba jagi lokti dena menendaktsür. Office nunga nisung kadi pa/ la shilem shitak meinyakba ajanga telok ajak nem teraksa bener arudaktsür.

Laishiba jagi asenok meranga inyaka alitsü indang ajungshir. Aseni kechi inyaker, aser ibaji ajanga tangar taküm koda kongshir, ibaji kanga junga bilemdangtsü ayongzük. Azümesenba nem asen mokokdaktsüba ajanga asen sempet tali jangjadaktsür aser asenok meketa aliba adianu asoshi tajangzük bener arur.

SARASADEM:

Tsüngrem ni akok tashi azümesenba kü taküm madak Kibur mekümdaktsütsü ni ne dang nangzük. Amen.

September 25-28 anogotem nung Pope-i France semdangtsü



April ita nung France Tir, Emmanuel Macron-i Vatican semdangba mapang Pope Leo ajurudang tangokba noksa nung angur.

May 16, 2026: Taküm September 25-28 anogotem nung Pope Leo XIV-i France semdangtsü, aser ibaji tesüiba küm 18 tsüngda tang mezüng Pope kati official süa France semdang asütsü, ta Honibarnü Vatican-i sangdong ka ajanga metetdaksü.

United States nungi mezüngbuba Pope-i Paris nung United Nations' culture agency UNESCO headquarters semdangtsü, ta Vatican-isa metetdaksü.

June ita nunga Pope-i Spain

semdangtsü. Taoba Pope Francis-i France nung Strasbourg, Marseille aser Corsica asetkong semdanga liasü, ajisüaka ibajibo official süa semdangba masü.

French Bishops' Conference (CEF) Tir, Cardinal Jean-Marc Aveline-i Leo dang France semdangtsü mepishia liasü aser taküm April ita nung France Tir Emmanuel Macron-ia Pope ajuruba mapang pa dang France semdangtsü mepishia liasü.

Emmanuel Macron-i X ajanga, "Pope Leo XIV-i France

semdangtsü ta shiogo, aser ibaji ajanga onok kanga pelar. September ita nung pai semdangbaji ozü linük atema akhümket ka asütsü, Catholic Khristantem atema tepela tulu asütsü aser ajak atema teimla mapang ka asütsü," ta metetdaksü.

Tan ita tetenzüklen Aveline-i, "Iba ya tepelatsü tulu saka iba nung ya khuret-a tulu lir. Pope shimba sülen ni pa den sensaksemba mapang nung pai linük semdangtsü jangraba lemsatepa liasü. Talisa pai France nung Arogo tia metettsü jangrar, iba ya missionary tejangraba ka lir," ta metetdakja liasü.

France nung loktiliba, yimtrenren aser Laishiba tesayuba dak sendakba nung mangatettep aika adoka aliba mapang ka nung Pope-i France semdangtsü.

Pope-i France semdangba mapang nung Lourdes-a semdangtsü. Iba tesem ya alima tesem balala nung aliba Khristantemi temeshi ainlen jajadang semdangba tesem ka lir.

1983 aser 2004 kümtem nung Pope Jean-Paul II-i France semdanga liasü aser 2008 küm Pope Benedict-i France semdanga liasü.

Syria nung aliba Arogo ka nung mangyimertem amaktsü merang

May 16, 2026: Syria ajanga, "Tsüngrem yimtiba, Aleppo nung taochi ajanga iba aliba Tenla kidang lendong nokdangba nisung kari bomb amshia asoshi mezüngbuba nung Pa nem tenüngsang merang, agütsür. Onoki security Tsüngrem taochi agi sepaitem danga pelar," ta kümzük. metetdaksü.

Tasü mang abenba "Iba linük aser yangi gariji St. Ephrem Tenla aliba nüburtem kümzükka ki telungi aiba mapang alitsü atema onoki nung gari nungjagi oset sarasademer," ta kasa ka tsük, iba sülen sangdong ajangasa parnoki iba osangji police metetdaksü. nem metetdakja liasü.

Syria ya Open Doors indang World Watch List nung züngoka lir. Iba liasü. linük nung mapang shia Islamic kiralongrartemi

Open Doors den jembidang mangyimer kati, "Tia kaa onok kümzükogo, kechiyong Yaküm June ita Tenla kidang bomb ji nunga Islamic kiralongrartemi apok asübo nisung aika k i r a l o n g r a r t e m i samala", ta ashi. Damascus nung aliba

Syrian Orthodox Mar Elias Arogo Tenla ki Archdiocese of Aleppo & amakba lendong nung Environs-i sangdong ka nisung 22 asü.

AO OSHI ANGAZÜKDAK:

TANÜ ANGAZÜKTSÜBA OJANG



Yashi

(v) jungjunga yua aliba mashimashi entok (scatter)

* An-i tsük pua aliba yashia endoktsü.

Yashia

(adv) talubosa, jenti, agir magima (plentifulness)

* Asenok ya Tsüngremi yashia moatsür.

OLONG PAITEP # 7506

16x16 crossword grid with numbers 1-16 indicating starting positions.

TIPLÉN

- 2. Auonungchiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A___g
6. Mopung apodoka
9. Tongtipang tagitsü
10. Menungra bilem
11. Aiür
13. S___k
14. T___r

OLONG PAITEP # 7505 TELANGZÜBA

TIPLÉN :

- 1. Tansütsü, 4. Mojing, 5. Pila,
6. Masü, 7. Nok, 9. Ako, 10. Putu,
12. Jung, 13. Tzüwar,
14. Tsüngrem.

LANGTSÜNGLEN :

- 1. Temola, 2. Saisapong, 3. Alan,
5. Pongtsüng, 8. Shirem, 11. Ajak.

NAI-A YA METETTER



May 13, 2026 nü alima nung blue-green diamond tulutiba CHF 13.6 million (\$17.4 million) yong yokteta world record ka yangluogo.

Pastor'er jabasoi tebu tepseter nem tatok agütsür



Imphal, May 16, 2026 (Agencies): Tawa Manipur kübok Kangpokpi District nung tepsetba arogo lennir ka jabasoi tebu tepsetertem nem tatok agütsür ta metetdaksüogo.

aremba sentong nung pastor Rev. Dr. V. Sitlhou'er jabaso Haominlun Sitlhou-i iba osang metetdaksü. "Tsüngrem tenüng nung aser yimjung taginüba atema kübo tepsetertem nem ni tatok agütsür" ta Haominlun Sitlhou-i ashi.

tanüngba Kuki civilians chiochtsü atema tiyongtsü ia yariteptsü mepishia metetdaksü. May 13 nü Kotlen-Kotzim road nung aliba Zero Point nung garitem amakdang Rev. Sitlhou den anogo lennir ana khaset. Iba lendong nungsa nisung aika yirua lir.

Meghalaya sorkari Lapangap yimtsüngi sepai talila yoktsü

Shillong, May 16, 2026 (Agencies): Meghalaya-Assam arrtsü anasa Lapangap yimtsüng nung security personnel talila mapa lemsütsü ta Meghalaya Deputy Chief Minister Sniawbhalang Dhar-i metetdaksüogo.

tashi lungkak aita jaja aser aluyimertem kümzüka ayutsü takhangba agüja liasü. Assam kübok Karbi Anglong district nung alirtemi alu ayimba nung timtem agütsür aser tsünüsenbongtsü raksatsür ta parnoki ashi.

o atema masü saka yimdaklirtemi timtem ajurubatem indang lemsatep. Arrtsü tebilemstü yabo state level nung inyaktsü ta Dhar-i ashi. Tawa aluyimertem alu nung mapa inyakdang Karbi telok kari parnok nem timtem agütsüba atema sorkar dang teyari meshi ta paisa ashi.

16 buba Assam Assembly mezüng session alitsü

Guwahati, May 16, 2026 (Agencies): 16 buba Assam Legislative Assembly indang mezüngbuba session May 21 nungi tenzüksü. Dispur nung aliba Assembly Chamber nung session tenzüksü ta Assembly Secretariat-i ashi.

atema BJP MLA Chandra Mohan Patowary shimogo. Patowary-i pro-tem Speaker ama Assembly mezüng amending züngsemtem nem tezüngzüktep agidaktsütsü. Anogo pezünü Assam Assembly session ya May 26 tashi agitsü ta Chief Minister Himanta Biswa Sarma-i shia liasü.

lennir tejen aser taoba minister Ranjeet Kumar Dass tenüng agütsüogo. Assam nung 2016 küm mezüngbuba BJP-i aniba sorkar akümdang Dass-i-Speaker inyaka liasü. Assam nung NDA-i kümsük tasemben atongtepa sorkar akümtsü tashi angu. Taküm Assembly elections nung Bharatiya Janata Party (BJP)-i menden 82 aser parnok den yariteper Asom Gana Parishad aser Bodoland People's Front ajanga menden terer (10) nung takok nguteta liasü.



Adi tetsürtem sobaluiba wazüka ayutsü aser lanu pututem ajungmesotsü atema Adi Baane Ane Kebang-i 'Banné Nog-ying' ta ser sobaliba azük ka sayaogo. Pasighat nung aliba IGJ Government Higher Secondary School nung sentong ka agidang Adi teburtemi 'Dudab' agiba mesüka Adi tetsürtem asoshi sobaliba maitsü tasen ka saya.

ADVERTISEMENT

Impur Bible Seminary nung Faculty ka nungdaker (preferably Male), anungji temsüa alirtemi aguja aliba department nung apply asütsü jaoker

Post	Qualification	Documents
Faculty in History Of Christianity Department	M.Th. degree from Senate of Serampore College/University	Bio-Data; Contact number, Xeroxed Transcript & Certificate of Class X- M.Th; Medical Fitness Certificate

May 25th, 2026, tashi nung kuli kaket ajak abensa Principal, Impur Bible Seminary Office nung tongtsütsü metetdaksür. Iba Seminary email ajanga nenoki documents tem submit sütettsü akok (Email: ibsimpur@gmail.com).

**Principal,
Impur Bible Seminary, Nagaland**

Nigeria nung telungpurtemi kaketshirtem aika pua bener ao

Abuja, Monupii/May 16 (Agencies): Nigeria kübok Borno state nung telungpurtemi kaketshirtem aika pua benerogo, ta iba tesem nungi alirtemi Reuters aser AFP news agency dang ashi.

Telungpurtem yagi Askira-Uba Local Government Area nung Hokolbar anepdang school agia aliba mapang Mussa Primary and Junior Secondary School-i ai aser kaketshirtem aika pua bener ao, ta school anasa alir Ubaidallah Hasaan-i Reuters dang ashi.

Tesayur kati Reuters dang ashiba agi, telungpurtem ya motorcycle tem nung mener aru. "Kaketshirtem kar jena oa süngsempok nung atsük, saka aika pua benerogo," ta tesayur yagi ashi.

Kaketshirtem pua bener aoba ya telok kati danga

nanzüka mali, saka Boko Haram telok asütsü ta temulung meleme bilemer. Local ozüng yanglur Midala Usman Balami-i, iba tatalokba ya temulung raksatsüka ta shia ketdangsürtem dang takaratiba nung jenjang tapet agitsü mepeshia metetdaksüogo.

Africa nung nütsünyongsökü timtiba aliba linük ya küm 17 tashi iba amala teloktem yagi timtem agüja arudar, shirnoki nisungtem pua bener aoba ya parnok atema tongtibang inyakyim ka kümdaktsüogo. 2014 küma Chibok nung tetsür kaketshir noklang aika pua bener oa liasü.

Sen aazüksü atema nisung aika pua bener aoba ya ozüng alema inyaksangshiba teloktem atema tongtibang inyakyim ka kümogo. Parnoki talisa sorkari mayimjamba tesemtem nung iba

amala inyakyim benoka inyaker. Hopta ishika tejakdang ozüng alema inyaksangshiba telok kati Nigeria kübok Kogi State yimtiba, Lokoja nung orphanage ka amak aser tanur 23 pua bener oa liasü, ta Information Commissioner Kingsley Fanwo-i metetdaksü.

Borno aser kidanger state tem nung military-i meita aoba sentong benoker inyaka liaka school aser nüburtem maneni maka arudar aser iba ajanga yimdak yimtsüngtem security-i mayimjamba tebilmsü tali adokdaksüogo.

Hokolbarnüsa telungpurtemi Oyo state nung Baptist Nursery and Primary School nungi kaketshirtem pua benerogo. State-i iba tesem nung school tem shibangtsü tetuyuba agütsüba den telungpurtem ya aputsü atema jenjang agidar.

Russia tir Putin-i May ita 19 nü China semdangtsü

Moscow, Monupii/May 16 (Agencies): Russia tir Vladimir Putin-i May 19 aser 20 nü China semdangtsü, ta Kremlin-i sangdong ka ajanga metetdaksü.

Linük ana tsüngda comprehensive partnership aser strategic cooperation akangshitsü atema Putin aser China tir Xi Jinping nati sentong yanglutsü, ta kasa sangdong ajanga metetdaksü.

Putin-isa, rongsenketzüng aser shishilemba balala dak sendakba nung China Premier Li Qiang den sensak asemtsü lir.

Russia indang TASS news agency-i ashiba agi, Treaty of Good-Neighborliness & Friendly Cooperation yangluba sülen küm 25 ajunga mapang Putin-i China semdangtsü.

Linük ana tsüngda iba tenangzüktepba ya 2001 küm yanglua liasü.

United States tir Donald Trump-i China toktsür aoba sülen anogo ka lir Putin-i China semdangtsüba osang sangdongogo. Küm 10 tsüngda US tir kati tang mezüngbuba China semdangogo.

Trump aser Xi nati shishilemba dak sendakba nung tenangzüktepba aika yangluogo, saka Taiwan mesüra Iran den US-Israel rara amala tongtibang onüktem nungbo tenangzüktepba tajung mey anglutet.

Tenatisa Russia-Ukraine rara indang sensaksemogo. Iba ken o nung yabo China shinga dena dena mali aser Xi pa ya yimjung atema teyongtsü ia inyaker ka ta shiogo.

Kasa mapang nung Reuters aser news agency temi, "industrial refrigeration units" ta nungja agütsür drone assembly plant tem atema shipping engine tem agüja Russia atema drone yanglutsüba nung teyari agütsüogo, ta ashiba ya China-i magizük

Washington aser Beijing na tesendaktep anakshiba mapang ka nung ita tsüngda China aser Russia nabo tesendaktep akangshiogo.

Linük ana ya military allies bo masü saka yimden yimsüsüba aser rongsenketzüng nungbo kanga junga sendaktepa lir, aser anüolen aliba linüktemi Russia den tesendaktep meyui akümba mapang China-i jenjang talila agishia Russia indang totzü aser osettsütem alia arudar.



Nigeria aser United States na longjemer meita aoba mapang Islamic State (IS) lenir Abu-Bilal al-Minuki tepsetogo. US tir Donald Trump-i ashiba agi, Minuki ya alima ajunga nung ISIS indang second in command aser alima nung kiralongrartem rongnung kanga yakyaka inyaker ka liasü. Nigeria tir Bola Tinubu-i, linük ana senteper iba meita aoba sentong benoka inyakba sülen IS pur akoksadaksüogo, ta ashi.

PELABA LEMSATEPER



20.05.1937 - 09.05.2026

"Tasüba ya tatebang masü saka tatem maka alitsü atema tetenzüker lir."

Onoki teti dang meima aliba ojala asür Temsünaro (Khar) arishi küm 89 tashi iba lima nung lir May 9 nü kotak yima ogo. Temeim, ajemalu aser taremsük agi sünga aliba tetsür ka, lai Tsüngrem peladaktsütsüsa litetogo.

La kimai moteti akümba mapang kidanger, medemer, Arogo züngsemtem aser külem tenzükertem shirnokisa onok den ajurutepeba mapang la koma ali metetnua asüngdangba aser sarasadem aser tebilemba tajung agi onok nongita yariogo, nenok ajak dang kanga pelar. Maneni la iba lima nungi pilaba anogo shirnokisa onok mulung süngzüksü o, nübu, sarasadem, osettsüset aser rongsen agi onok nongita yariogo, nenok ajak dang kanga pelar.

Mejeta onoki Zion Hospital nungi Dr. Sashi Walling dang kanga pelaba lemsateper, shibai pa kanga mazüngi liaka la akümüli tatebang ka dangi aruba mapang kanga junga anepaluogo.

Nenok mapa tajung asoshi Tsüngrem nungi temoatsü meshizükja ozü kibongi nenok asoshi maneni sarasadem nung abentsü.

- Temeim kinungbo, chirnur, anükapang, semchir aser kinungertem.

AFFIDAVIT

I, Mr. Muzakir M Ahmed, through this Affidavit vide Regd. No. 170 Dt. 15/02/26, declare that my name has been inadvertently recorded as Sanjit in my Aadhar No. 220997435001 and the same should be corrected as Muzakir M Ahmed and that i shall use my name as Muzakir M Ahmed in the future for all oddicial and legal purposes.

Deponent.

Ceasefire sangdongba sülen Israel-i nisung 6 tepset: Lebanon

Beirut, Monupii/May 16

(Agencies): Israel-i anüng ajanga southern Lebanon nung jila ka amakba sülen nisung trok tepsetogo, kong paramedics asem densema liasü, ta Lebanon health ministry-i ashi. Linük ana tsüngda anogo 45 atema ceasefire benoktsü mulungtepogo, ta US-i ashiba sülen iba jila ya maka liasü.

Health ministry-isa, Harouf jila nung civil defence centre ka amakba sülen paramedic pezübuba kanga mejungi yirur lir, ta ashi.

Hokolbarnü US state department-i, Washington DC nung anogo ana sensak asema sülen Israel aser Lebanon nati ceasefire atsülangtsü atema mulungtepogo, ta metetdaksü.

US tir Donald Trump-i April 16 nü ceasefire benokba sangdong, saka Israel aser Hezbollah na maneni raratepa aruogo.

Bodhbarnü Lebanon health ministry-i ashiba agi, Israel-i linük south len tesem balala amakba sülen tanur ti densema nisung 22 tepsetogo.

"Iba sensaksem ajanga linük ana tsüngda teti asoshi yimjung adokdaksütsü, linük kati ka sovereignty aser litsü agizüka akümtsübuteptsü aser arrtsü nung security akangshitsü imlar," ta state department otongdar Tommy Pigott-i ashi.

State department-isa, parnoki sensaksem atema June ita senden ayongzüksü, ta ashi.

"Iba den bendenloksema Pentagon nung May 29 nü security track ka amenoktsü, kong linük anaprongla nungi ketdangsürtemi shilem agitsü," ta Pigott-isa shisem.

Kasa mapang nung US dangi Israel Ambassador Yechiel Leiter-i, sensaksem ya sadoksadoka aser tagitsü keta kaogo, ta ashi.

Lebanon Ato Kilonser Nawaf Salam-ia, Israel den sensaksem nung parnok jenjang yanglushitsü atema Arab linüktem aser international teyari bushitsü, ta ashi.

Ceasefire tenzükba sülen Hezbollah aser Israel na Lebanon south len arrtsü nung anogoshia amai raratepa aruogo.

Israel-i tawa anüng ajanga Lebanon kübok tesem balala tali maka arudar, aser ashiba agi, parnoki Hezbollah züngsemtem aser parnok indang infrastructure tem amaker.

Ajisüaka Lebanon health ministry-i, Israel-i nüburtem aser paramedic tem amakba atema parnok aitsüogo, koba Israel-i magizüki arudar.

Rara nung Lebanon nung nisung 2,896 shi tepsetogo aser Israel nunga sepai 18 aser civilian pezü tepsetogo.

South Korea captain Son World Cup 4buba asayatsü renemer



Son Heung-min

Monupii/May 16, 2026

(Agencies): Taoba mapang Tottenham Hotspur forward Son Heung-min, World Cup pezübuba nung asayatsü atema South Korea squad nung züngoksemogo.

Arishi küm 33 tain asayar ya taoba küm Spurs toktsü aser tang Major League Soccer club Los Angeles FC nungi asayadar.

Taküm World Cup nung South Korea team mezüngbuba asaya June 12 nü Czech Republic den asayatsü aser co-hosts Mexico den June 19 nü asayatsü. Asaya anaprongla Guadalajara nung asayatsü aser iba sülen June 25 nü Monterrey nung South Africa den

asayatsü.

Coach Hong Myung-bo-i sangdongba team nung asayar tejentem aika dena lir. Squad nung Wolves forward Hwang Hee-chan, midfielders Bae Jun-ho (Stoke), Paik Seung-ho (Birmingham), Celtic nungi Yang Hyun-jun aser Swansea nungi Eom Ji-sung nung densema lir.

Squad nungsa Paris St-Germain midfielder Lee Kang-in, Bayern Munich defender Kim Min-jae aser Germany nung asoba Borussia Monchengladbach defender Jens Castrop nung densema lir.

Castrop tebu ya Germany nung aser tetsü Korea tsür lir.

Pa arishi küm tatakzük balala asayamungtem nung Germany tenüng nungi asaya saka taoba küm senso agizükba sülen South Korea team nungi ponguben asayaogo.

South Korea World Cup squad

Goalkeepers: Jo Hyeon-woo (Ulsan), Kim Seung-gyu (FC Tokyo), Song Bum-keun (Jeonbuk)=

Defenders: Kim Moon-hwan (Daejeon), Kim Min-jae (Bayern Munich), Kim Tae-hyon (Kashima Antlers), Park Jin-seob (Zhejiang), Seol Young-woo (Red Star Belgrade), Jens Castrop (Borussia Monchengladbach), Lee Ki-hyuk (Gangwon), Lee Tae-seok (Austria Wien), Lee Han-beom (Midtjylland), Cho Yu-min (Sharjah)

Midfielders: Kim Jin-gyu (Jeonbuk), Bae Jun-ho (Stoke City), Paik Seung-ho (Birmingham), Yang Hyun-jun (Celtic), Eom Ji-sung (Swansea), Lee Kang-in (Paris St-Germain), Lee Dong-gyeong (Ulsan), Lee Jae-sung (Mainz), Hwang In-beom (Feyenoord), Hwang Hee-chan (Wolves)

Forwards: Son Heung-min (LAFC), Oh Hyeon-gyu (Besitkas), Cho Gue-sung (Midtjylland).

Satwik-Chirag na Thailand Open final-i iogo



Monupii/May 16, 2026

(Agencies): Badminton asaya nung India nung tebur tarep asayatem rongnung temaba jenjang nung aliba tarep Satwik aser Chirag nati Honibarnü Bangkok nung semifinal asaya nung Malaysia nung Goh Sze Fei aser Nur Izzuddin na 19-21, 22-20, 21-16 agi koka final-i iogo.

Minute 82 kanga belema toktepbu asayaba sülen tena 2026 küm tang mezüngbuba final kati iogo, aser ajak senteper Thailand Open final tasenbubai iogo. Tenati iba asayamung 2019 aser 2024 küm koker lir.

Mezüngbuba game makokba sülen Satwik aser Chirag na pressure nung liasü, saka tenati telangzüba tajung agüja 22-20 agi asaya koka liasü.

Deciding asaya nungbo India nung tarep yagi asaya amokbanger asyar aser No. 9 Malaysia nung tarep ya 21-16 agi koka liasü.

Satwik-Chirag nati Malaysia nung tarep ya tang agi tibenbuba atonga kokogo.

Tena final nung Indonesia nung Leo Rolly Carnando aser Daniel Marthin na mesüra China nung tarep He Ji Ting aser Ren Xiang Yu na den asayatsü.

Kasa mapang nung India tsür Shriyanshi Valishetty-ia Baoji China Masters Super 100 event nung kanga junga asayadar.

Taoba hopta Mexico International Challenge akokba sülen Shriyanshi-i, China tsür Junior World Champion Xu Wen Jing 21-13, 21-17 agi koka tetsür kija asaya final-i iogo.

India tsürta yagi asayamung tepeyong asaya balala amokbanger asayar arudar aser tang tashi nung game ka dang mekoki lir.

Final nung Shriyanshi, China tsür Yuan mesüra Thailand tsür Nithiittikrai den asayatsü.

Aston Villa-i goal 4-2 agi Liverpool koka CL asayatsü jangjaogo



Aston Villa nungi asayar Ollie Watkins-i goal idaktsüba sülen pelatepbu noksa nung angur.

Monupii/May 16, 2026

(Agencies): Ollie Watkins-i goal ana idakja Aston Villa puri goal 4-2 agi Liverpool akokba sülen parnok taruba season Champions League asayatsü jangjaogo.

Hokolbarnü takok anguba sülen Villa puri asaya 37 nung point 62 ngua Premier League table nung pezübubai tuogo aser kasa mapang nung Liverpool-i point 59 ngua lir.

Champions League atema qualify asütsü atema asayaba mapang Liverpool puri Bournemouth aser Brighton na mekokteti tang asaya aliba season nung asaya 12 tashi nung tamakok angu aser point teku dang angutsü anunga aliba

mapang parnoki point ka dang ngutet.

Asaya nung Morgan Rogers-i asaya mezüngbuba shilem nung Villa atema mezüngbuba goal idaktsü, ajisüaka asaya tanabuba shilem tenzüker mapang tatsüka tsüngda Virgil van Dijk-i Liverpool atema goal ka idakja kasasa aküm.

Ajisüaka Watkins-i goal ana idaktsüba den John McGinn-i goal pezübuba idaktsüba sülen Unai Emery-i aniba telok yagi asaya kokogo. Parnok Bodhbarnü Freiburg den Europa League final-a asayatsü lir

"Onoki iba asaya akoktsü nungdaka liasü. Iba ajanga onok Bodhbarnü asaya kanga junga

jangradema asayatetsü," ta McGinn-i Sky Sports dang ashi.

"Watkins March ita tezüdanga liasü (pa England squad nung mezüngok), saka iba ajanga pa tali ajungmeso aser pai tajungtiba nung telangzüba agütsüogo.

"Pa onok den densemba ya kanga tia taka, aser pai taoba season ishika club atema kechi inyaktsüogo, iba ya jangrademtsüka lir. Taruba hopta-a pai kasa ya asayatetsü imlar," ta paisa shisem.

Villa pur Freiburg den asayatsü atema Istanbul-i aotsü. Iba season parnok nükjidong tulutiba kabo tongtetogo aser ano tekok maroka ka bener season tembangtsü maongka lir.

ICC-i Pakistan dang match fee shilem 40 senchi achi

Monupii/May 16, 2026

(Agencies): Bangladesh makokba sülen maneni ICC-i Pakistan team dang senchi achiba den ICC World Test Championship 2025-27 standings nung point ajemtsüogo.

ICC-i Hokolbarnü sangdong ka ajanga Pakistan dang parnok indang match fee shilem 40 senchi achiba aser Bangladesh den mezüngbuba Test nung atakzükja aliba mapang dang nungi over ti tali agiba atema point ti ajemtsüba metetdaktüsügo.

Iba temerenshi agütsüba ajanga Pakistan team WTC campaign nung tetsükdaktsü adokogo. Point ajemtsüba sülen parnok point pezü dang kuma tibubai asepbu luogo aser West Indies jakdang dang lir.

Bangladesh-i mezüngbuba Test nung Pakistan run 104 agi akokba sülen anogo ka lir iba temerenshi ya agütsü. Bangladesh team-i tang mezüngbuba Pakistan team home nung kokogo. Tatabangbuba anogo pressure mekoki Pakistan team chirepa liasü.

Iba asaya nung Fast bowler Nahid Rana-i kanga junga asaya-a pai wicket pongu agi aser Bangladesh team takok dangi ani.

ICC Code of Conduct kübok Ocet 2.22 nung asayatem dang par team-i atakzükja aliba mapang tsüngda over monmaba shia match fee shilem pongu senchi achitsüba lateta lir. Pakistan team over ti agi matong asünung match fee shilem 40 senchi chiogo.

Kasa mapang nung point ajemtsüba ya World Test Championship indang Ocet 16.11.2 küboki aittsü, kong atakzükja aliba mapang tsüngda over monmaba shia championship point ka ajemtsütsüba shia lir.

Pakistan captain Shan Masood-i aibelen ya agizükogo, anungji ken o angadangtsü nungdak amdoker.

Ken o ya umpire Richard Kettleborough aser Kumar Dharmasena na den third umpire Allahuddien Palekar aser fourth umpire Gazi Sohel nungeri benok aser match referee Jeff Crowe-i temerenshi ya agütsü.

BILEMDANGANG

"Tatalokba karbo asenoki maginer saka agizüktettsüla."